

四庫全書

集部

欽定四庫全書

文恭集卷二十八

宋 胡宿 撰

帖子詞

皇帝閤春帖子

素本集諸帖子各有五言體  
此亦宜有之殆為傳寫缺佚

三元鳳歷當春始萬壽龍危進御前  
綵勝朱旛宜此日

金枝玉葉慶新年

蒼玉新旂祀木神  
今朝太皞始司春  
農躔漸覺星辰正

壽歷長隨日月新

翦綵房中新勝出披香殿裏早春回祥雲更傍南山起  
來對君王萬壽杯

苑中芳樹條風細天上黃鸝杲日遲仙果定生千歲實  
祥烟長護萬年枝

春官青鳥司開啓星舍蒼龍主發生甘雨惠風資帝力  
杏花蒲葉勸民耕

玉殿香絲縈綵縷金盆白雪間紅花子孫千億無疆壽

盡逐東風入帝家

皇后閣春帖子

義仲司暘谷塗山佐夏王六宮師儉德四海化躬桑  
中禁千祥集東方萬象新綵幡迎喜氣寶字鏤宜春  
東陸韶光先四序周南風化被羣芳資生萬物昭坤德  
嘉慶千春集紫房

東風初入長春殿碧溜新融太液池社遠未當迎燕日  
川晴先近浴蠶時

白綠仙雲雜紫雲長生靈氣護元君已膺虎劍司陰教  
更珮金璫奏寶文

妃閣春帖子

日向陰虬永春隨綵鳳歸玉京多燕喜金殿滿光輝  
宮中玉漏迎遲日天上珠躔麗次星軒頊聖圖光億載  
皇英賢範奉千齡

音官始奏融風至御水初傳曉凍開寒漏催將仙臘盡  
春旂飛入貴宮來

翦綵平明出藝房  
長生殿裏百花芳  
書銜燕子青春早  
劍拂仙衣白日長

夫人閣春帖子

綵樹春芳滿仙  
蕙晝景長  
早花依玉砌  
初溜漾銀塘  
浴種宜蠶事  
修禱盡燕祠  
資生迎木正  
蕃衍納春祺  
釀酒淳神水  
延年飲露華  
八風朝聖日  
三境住仙家  
雪晴宮樹有新梅  
來報東郊淑氣回  
春令先從天上起  
年芳初向日邊開

迎氣青幡獵曉風九門佳氣鬱葱葱日華初在搏桑上  
春色先歸御柳中

皇帝閣端午帖子

南極注生氣音官協夏鈞良辰五日永景福四時新  
曉霽澄天宇離明敞帝閣靈符千福集神印百邪奔  
剛日逢端始炎辰屬長羸君王仁且聖慈旨卻臬羹  
殿戶還颺入宮池御水涼綵舟人競渡化國日偏長  
四時乘大德五日敞金扉陽晷移南陸天光盛紫微

商管微陰動良辰午正端三光扶聖壽億載奉皇歡

三殿茲辰奉御觴薰風梅雨好年光炎天更作奇峯勢  
來表南山壽歷長

後宮鴛鳥將雛樂上苑安榴著子新嘉節已將天合數  
明離還覩日重輪

南方炎帝本乘離長育羣生在此時命縷綵花傳故事  
風光天上更相宜

南方朱鳥司時令東闕蒼龍護禁扉萬壽御觴端日舉



祥風三殿繞雲旂

九霄嘉節重端辰  
命縷靈符粲寶文  
虞舜無為心自正  
五絃琴上奏南薰

寶岐麥色黃雲重  
御苑榴花丹焰深  
已顯豐年資帝力  
更憑佳節悅天心

皇后閣端午帖子

川館親蠶後宮房  
獻繭初香繒爭點  
畫綵縷競垂舒  
棟葉迎新侯  
菖花發美祥  
憂勤宣內則  
嘉宴助時陽

靈艾傳芳遠仙萸吐葉新配乾資厚德介祉集嘉辰  
星火朱光熾繒絲采物華謹謠宜聖日王氣協皇家  
紫禁端辰晝漏長朱陵生氣盛南方長秋此日司陰教  
皇極同時納壽皇

壽觴百福融甘露寶索千祥鏤彩雲五日永逢佳令節  
億年長奉睿明君

香爐角黍傳三楚丹篆靈符辟五兵更有龜臺仙藥在  
河洲賢德保長生

靈苗遠採三山藥仙篆高飛六甲符此日萬神同翼衛  
長秋洪算與乾俱

蕤賓干氣盛災方坤德資生茂百昌西域葡萄初蔓衍  
成周瓜瓞更綿長

楚糗雕盤九子香綵絲朱索更迎祥坤元此日扶皇極  
偉兆先時協壽房

夫人閣端午帖子

五絲通遺問百草鬪輸贏神印能祛惡靈符解辟兵

天家饒物采華節有光輝明月裁歌扇輕霞翦舞衣  
禁苑年光麗端辰物象華天風結桃實火德盛榴花  
蓮葉抽芳際榴房結子初長年鬪百草舊俗祭三閭  
廣殿回雕輦滄池漾綵舟堯心順時令不是重嬉遊  
魚龍曼衍夸宮戲湘虛浮沈街水嬉齊上聖皇千萬壽  
飄然仙樂在瑤池

故事順時羞角黍舊儀乘節浴蘭湯人間涼麥欣時豫  
天上薰風愛日長

續命由來宜綵縷辟邪相向佩靈符夏鈞調樂長生酒  
歲歲宮中祝聖圖

宮中應節垂金縷天上迎祥捧玉卮更奏開元羽衣曲  
年年長願侍瑤池

彩艾相傳禳故氣香茅競愛結靈芳炎洲正覺仙遊盛  
化國偏知日景長

上梁文

醴泉觀涵清殿上梁文

兒郎偉國家出神明之後濬發靈源受天人之歸勃興  
炎歷軼夏商而拓迹介河洛以造邦混并八紘傳序四  
葉皇帝紹祖功宗德之烈躬神武聖文之姿大明燭于  
六幽至仁孚于羣品運陶甄而範俗丕變中和偃戈革  
以靖民洽臻昭泰大秩百神之祀上躡三靈之休天瑞  
格思坤珍至止眷言京室粵在巽隅有龜蛇合體之精  
顯水土北方之異蟠居息壤泌湧榮泉色華清以蕩邪  
味甘飴而蠲疾祥聞神隲惠洽都人有悅宸心爰稽瑞

牒即其爽塏峙厥靈祠嚴香火之薰修極規模之壯麗  
鬱攸弗戒豈冥數之有常建章乃營在舊文而可作集  
班倅之巧匠飭荆楚之美材攷工程能庶民獻力天老  
練其日策石申候其星經抗華殿以正基架修梁而結  
宇雄虹晨挂采翟朝飛聳層構以凌雲成新宮于不日  
道旁盛于輿馬觀者同于堵牆飫賜之豐既覃于微阜  
驩謠之美敢采于游童且慶落成用陳善祝

兒郎偉拋梁東石橋觀日任施功三韓百濟歸封內方

丈蓬萊在日中

兒郎偉拋梁西青雲可上不須梯  
雪山葱嶺人無外宛馬蒲桃路不迷

兒郎偉拋梁南赫赫王靈海外覃薰風  
養物深仁被鯁壑無波至德涵

兒郎偉拋梁北天子威靈操斗極單于  
攪酒奉驩盟潢水占風朝有德

兒郎偉拋梁上路近銀河翻碧浪  
陽烏戢翼過猶疑金



雀栖觚鎮相向

兒郎偉拋梁下鬱鬱祥氛徧朝野九龍于此護靈泉六  
甲相將扶大廈

伏願拋梁以後帝圖益大天歷彌長區宇嘉靖歲物蕃  
昌乾剛增九五之吉本支茂千億之祥惟威神之館御  
佑鼎祚以無疆

集禧觀大殿上梁文

兒郎偉我國家席真祖之慶源受上穹之駿命誕膺炎

歷昭啟黃圖設都河洛之間廣朝萬寓建號房心之次  
大撫八紘威稜震于鬼方聲文燁于海裔訖惟人面之  
類達于王土之濱莫不重九譯以來庭執萬珍而入貢  
奉昭華之玉琯獻弱水之神香如衆星之拱北辰若百  
川之赴巨海三代土疆之制悉統京師五岳神靈之祠  
並居封域欽屬先真之聖尊加帝者之居爰就國陽載  
嚴館御奉真游而惟永歷年祀以彌長皇帝上聖難名  
至人冠古纂睿圖于三后接遐武于九皇仁厚之風誕

孚于億聖齊明之志昭達于萬神謹聖志以奉先穆淵  
衷而居上欽山岳崇高之祀勤歲時朝謁之誠徐御乾  
龍疑瞻睟像爰攷斯干之制載新大壯之模選文梓之  
偉才即坤靈之寶勢千章工度庶民子來詔郢手而督  
繩命日官而推策駕修梁之百丈引建木之千尋歡聲  
沸于皇衢喜氣浮于絳闕輒采輿人之頌以廣游童之  
謠

兒郎偉拋梁東三韓鼓舞樂華風扶桑海樹朝暎上方

丈仙山瑞霧通

兒郎偉拋梁西觚稜迢遞與雲齊海中渤澥還驚淺天外崑崙更覺低

兒郎偉拋梁南萬壽山光滴嫩嵐伏波銅柱王靈遠虞舜薰琴帝澤覃

兒郎偉拋梁北天子聲明通斗極日南朝貢識天光塞外耕蠶知帝力

兒郎偉拋梁上日月星辰近相向雲中僊語近還聞天

上銀河明可望

兒郎偉拋梁下鬱鬱祥煙浮碧瓦柔桑蔽日徧羣方多  
稼如雲平九野

伏願上梁之後邦基鞏固天業暉昌元元躋于富壽日  
日擁于休祥少海重潤前星載光惟鼎祚之云遠與嶽  
鎮而無疆

修蓋睦親宅吳王院神御堂上梁文

兒郎偉我國家真祖開先靈基憑厚太微正氣上稟于

列精臨代寶符早恢于王略惟天眷命奕世多神乘火  
勃興紹乾闡繹祖功宗德造統葉于億年武略文昭茂  
本支于百世今皇帝至仁溥博上聖登閎利澤浸于懷  
生文告柔于異類極三光之均照逮九譯之所通莫不  
賓從悉蒙覆冒惇叙唐堯之族展睦宗周之親大列宅  
于京師廣析藩于茅瑞踰郇滕之啓胙厚魯衛之建封  
時乃維城請營原廟圖奉烝嘗之薦申懷霜露之恩勉  
從郡邸之章特置諸儒之議曰咨大匠往飭衆材攷北

拱之極星順方中之營室裁茲崇址詔厥清臺練日策  
以維良瞻霄衢之云霽大鳴鼗鼓上架脩梁治建木之  
千尋引長虹之百尺盈車載酒有肉如陵賜上林之錢  
茲焉山積頌織室之錦爛爾霞鮮工徒悅使以忘勞人  
士縱觀而竊歎仰天子蒸蒸之孝美公侯振振之風克  
成壯棟之規永保繇瓜之祚式揚駿烈用紀聖猷

兒郎偉拋梁東秋霽三山氣象通近窺日觀升雲白平

瞰天池浴日紅

兒郎偉拋梁西葱雪聲文萬國齊昭華玉琯今仍獻注  
水龍媒日更嘶

兒郎偉拋梁南重譯來朝美化覃越裳獻雉昭無外江  
鬱捐珠示不貪

兒郎偉拋梁北戴斗通驩懷以德偃兵武庫表王靈躋  
俗華胥資帝力

兒郎偉拋梁上鬱鬱葱葱扶大壯喬雲雕靄互呈鮮合  
璧連珠近相向



兒郎偉拋梁下華黍有秋盈綠野湯孚飛走洽深仁堯壤謳歌被純嘏

伏願拋梁以後聖圖日熾宸算天長導迎善氣感育少陽璇源逾遠玉榦彌強天休滋至地寶蕃昌惟與焉之粗構等歸若之靈光

文恭集卷二十八

欽定四庫全書

集部

文恭集卷

二十九至  
三十二

詳校官侍講 臣 王燕緒

檢討 臣 何思鈞覆勘

總校官原任中允 臣 王燕緒

校對官編修 臣 于 鼎

謄錄監生 臣 章玉植

欽定四庫全書

文恭集卷二十九

策問

御試賢良王彰夏策題

皇帝若曰朕繼祖宗之洪業撫區夏之重器臨政思治  
于茲三紀何嘗不中夕惕厲昧旦丕顯延訪茂士詢求  
讜言冀臻治平以垂永久子大夫裒然充賦咸造在庭

宋 胡宿 撰

得不欲摠發智蘊開沃朕心耶方今庶務小康至化猶鬱兵戎雖戢饋餉頗勞學校雖興禮讓殊鮮官冗而浮食者衆民疲而失職者多陰陽爽和膏沴間作經瀆弛于常道淫雨溢于舊防賦調尚繁昏墊靡息豈朕明有未燭德有未孚致咎之來在予為懼自昔繼體守文之君承前聖之烈藉累世之資致圉空之隆騰頌聲之美惟建武中興亟修文德貞觀特起驟致太平豈天時之協符將人事之胥濟功業遲疾奚其不同側席永懷望

古盈愧夫聖王之制世也必本于仁義之統師道德之  
說飭以儒雅頒其教令尋孝宣之治尚于刑名迹顯宗  
之政本于理法當二后之際信賞必罰刑清國富鳳凰  
屢下于郡國神雀比集于京師致茲美祥繫何然哉今  
公卿大夫與朕總方略美風俗而吏治未甚淳民德未  
甚厚豪右踰制姦猾冒禁以至守宰之任循良罕劭廚  
傳移于使客徃役迫于下貧殆有愁嘆之聲未弭鬱堙  
之氣豈躬行之弗類而圖治之匪章歟昔晁錯舉于賢

良公孫對以文學深陳政道竝先術數仲父治國之器  
內史詔王之柄咸垂格訓當安設施至于春秋之稱一  
元洪範之推九類何行而正其本何施而建其極子大  
夫習先聖之術熟當世之務識古今王事之體究天人  
精祲之原所以蕩穢致祥革弊興利受策應問咸以正  
對毋諱有司稱朕詳延之指焉

御試武舉策題

皇帝若曰夫威武者文德之輔功也雖復至治疇能去

兵比詔有司圖講常武博延方略之士參閱材技之能  
冀崇善經以馭長轡子大夫曉習兵策賁然造庭質于  
前聞佇乃明辯夫兵本于仁義戰畜于慈愛而曰詭道  
危事何耶邦國之法雖曰制軍而詰禁帝王之兵曷云  
以全而取勝司馬之體閔廓謂何霸者之師節制安在  
昔晉侯之伐秦也誰氏知其有功楚子之救鄭也何人  
料其必敗兵法貴拙速而譏巧久若然則亞夫失破吳  
之策充國無制羌之功也小堅大敵之禽什圍倍戰之

法曹公官渡之克何關於衆寡晉文城濮之戰試言于  
奇正直入武庫策本孰施先趨北山法何以勝朕嘗讀  
良史之傳疑各將之功以孫武子之才僅能入郢有樂  
毅之略不即下齊豈乏奇謀諒有深旨前代車戰其來  
尚矣後世以武剛而自衛以偏箱而致討或行則載于  
戈甲止則為于營陣宜條利害若為設施悉心以陳朕  
將親覽

試南省進士策題



問天道陰陽實通政事王者生殺宜循時令自秦任法  
理漢尚經術太初推歷甫用夏正故事報囚必盡冬月  
乃著經常之制初無淹繫之煩建武中興率遵舊典元  
和下詔始改孟冬議者頗贊其然通儒復譏其否執助  
陽順生之論持議獄緩死之說咸有經據著明言之國  
家道粹前王刑孚中典炎歷斯握則與漢同丹筆所論  
尚仍唐舊姑欲順三微之用事去四時之行刑凡當大  
辟之科悉限季冬之斷用遵卦氣以攷天心然而積習

生長更張慎始固惟明識雅富多聞幸商推于古今願  
詳陳于義理

問國家謹四夷之守飭三邊之備百萬之衆領在將屯  
什一之租縻于支計居常餉道仰糴富賈凡入粟于塞  
下例受錢于都內贏息莫計乾沒無涯歲或不登人且  
勞止道塗有捐瘠之歎郡邑煩振業之方深惟從權規  
欲濟事攷諸周典甫侯有贖刑之法稽于漢世晁錯有  
免罪之策所以厚民收怒實邊弭患且欲詳按舊制濶

略輕科自非犯盜殺人受賕撓法之類理不得捨意在  
必誅餘竝差次免刑之條申明入穀之贖以實邊境以  
防災潦雖復失之有罪不猶賢于賦民勗思張敞之言  
留省望之之議條陳利病開示話言

問八卦繇策而起九疇以數而興河洛之書相為表裏  
天人之際莫不該貫固以究性命之韞著禍福之效包  
括三極陰陽下民者也何則輔嗣解易孔氏釋書六爻  
文辭止明人事五種性行專推王者迨至上經下經離

為二說五福六極合為九類斯文若此其義安適申尋  
前世博存衆業京氏之術列于學官夏侯之經治于博  
士咸以儒者明于天道前賢多習舊史具存厥後蔑然  
其故何也且欲兼崇其學使名其家庶幾精義之弗淪  
或謂異端之斯害遲聞明辯用釋疑懷

問經莫大于易坎之彖曰王公設險以守其國丘明之  
傳曰恃險與馬無興國焉吳起對魏文侯曰在德不在  
險後世拘文之士莫不歎息起言引為鑒照按堯都中

冀舜都蒲阪夫豈乏德耶曷為竝據河山之勝哉豈易  
之書故不及春秋戰國一時之辯乎蒙竊惑焉願問經  
傳交戾之說折以至當

頌銘

烈文即政頌

聖文睿武仁明孝德皇帝御大器之踰年改元乎天聖  
協華寶歷承光祖統親朝長信用漢家五日之儀委成  
冢宰修商帝三年之制德心克廣孝思不匱又明年新

火再出祥琴且御皇帝慕孺軫悼明發忘寐顓居靖冥  
之館眇思恭默之道于時有位卿弼樂親戶牖之坐彼  
都人士渴聞警蹕之音懷思皇皇若有求而未得于是  
三府元老諸邸皇屬外廷表著之俊周衛環拱之士相  
與叩延英之閣奉需頭之奏且曰上天之載無聲樹君  
而司牧聖人之寶曰位代工而統治先王知駿命之不  
易也故光裕大德以席先靈之休知賢業之可久也故  
卜建冢嗣以系萬世之統所以尊一王之大固九鼎之

重三代之君綽有令問善繼志而述事能祈天而永命  
大橫啟兆隆奕世之基緒小心嗣位昭前人之光明用  
能登格皇穹俞受遐福詩書所嘆簡墨攸在陛下起元  
嫡握神寶典主震器協星海之輝潤紹休乾圖恢天日  
之覆照靜淵敦敏之性泰定于德宇緝熙光明之學優  
入于聖域播憲循于軌物賦政諮于哲艾躬承積累之  
慶奉持燕翼之謀是以六飛御辨之辰兩宮布度之際  
表裏悅穆上下安安五土柔嘉悉保于正色萬物森植

咸極于崇丘而陛下天姿粹溫聖性謙亮亦既禳除之  
制彌懷孺慕之愛金冊顯號推洪代而弗刻玉牀貴位  
虛長秋而未建上帝山川百神之祀久俟翠華之來咸  
池英莖六代之樂未登端冕之聽萬方企竦羣臣迷撓  
噴有夏蟲之疑鬱懷旱雲之望是宜推策迎日先天奉  
時攷帝典肆類之儀舉王祭升中之禮按元封刻石之  
事建明堂受記之歷紹建先憲拱揖羣神因斯而談不  
亦休歎上乃回精易慮煥發隆旨且曰羣公元宰告朕



以祖宗錫羨之美郊丘報貺之事敢不親執圭鬯以允  
天人之意若乃陟仙閣探神策薦功魄寶同符先帝此  
事體大未遑經畫姑俟十五物來徐議其可乃命太史  
練日儀曹具禮因義車之南至薦吉土之精享御時龍  
之乘備法物之駕百靈扈蹕齋于高廟翼日寶校次于  
帷宮天光晏溫日華明練陳玉帛二精之物建金石九  
奏之樂聲氣遠條坑谷皆滿薦鬯之夕絳光肅然照乎  
馨黍之薦奉以委山之瑞神具醉止禮成告罷回一就

之大輅御百常之豐樓大賚多方與物更始命廷尉蠲  
殊死之罪詔大農削逋租之籍條中藏之緡帛出上林  
之泉刀第賞六師均渥四極既而按羽林之寶仗即正  
陽之秘殿華芝對蔭暉幄竝開陛戟交于百重軒樂周  
乎四面萬國上計儼貢篚而駢臻諸蕃來朝端寶摯而  
森列桓桓螭虎之士我我鴻鸞之黨駸假無言相趨動  
色因感祀之訖禮譔徽名而紀德丞相常伯伏而奏曰  
陛下日靖中邦道躋先軌率循大卞附麗皇極粵若右

文稽古者為邦之丕教而陛下陶化染學崇四術六藝  
之風不曰聖文乎寧武圖功者制世之深略而陛下紉  
戎綏華得五表五餌之術不曰睿武乎仁者道之極摯  
而陛下勤恤民隱惠養含生之倫不曰仁明乎孝者行  
之難能而陛下躬奉天經宗樹錫類之本不曰孝德乎  
重以哀對上靈申嚴大祭煥揚盛則丕擁龐休冠德卓  
蹤格天光表而乃遵養景鑠逡巡懿號是道大無強名  
之字而天保失報上之誼也謹疏淪靈腑侷揣盛德攷

文金匱鏤章玉寶昧死再拜奉徽號上萬年之觴帝曰  
昔我三后以聖神紀物聰直在天覆蔭本支保右命歷  
資承長世之善充八舊貫之居尚賴股肱之良同扶樞  
極之重天正穀旦拜貺于郊休氣薰蒸福物萬舉抑乃  
長樂寶慈之攸感清廟先德之所及而近臣庶尹謬相  
歸美不斷來表俾享鴻名一日萬幾重增乎兢業也于  
時倚裳而歌呼望雲而連抃清光照于咫尺佳氣浮乎  
鬱鬱皇儀慶成謁者贊罷上猶懼涉道之未淵基德之

未厚漏泉之未及覆盆之未照退乃訪道宣室程書衡  
石詳裁治體總攬權綱覩墨家節用之文見老氏寶儉  
之語將矯華靡之弊獨宗簡樸之化清心以聚政絜矩  
以固本底慎財賦勸課農桑存恤鰥寡務休力役減尚  
方工巧之伎卻外府珍麗之貢明慎庶獄省察偏奏文  
書調度務從于簡寡號令風采顯尚以寬大水衡舉池  
蘗之地公給細民縣官疏鹽鐵之禁抑從未減譽髦斯  
士悉取于廉孝賦納以言咸用于經術體貌良弼容受

直辭猶謂天下之安忘戰不可聞外之制有備無患更  
乃講練兵政崇國防衛保大以靖民竭歡而敦族吏懷  
飭簋之潔家象濯纓之朝斯人有樂和之聲緣邊無晏  
開之警耕田鑿井飲食充乎四鬴鳴雞吠犬煙火接乎  
萬里洋洋乎韶盡美矣郁郁哉文之治也足以比榮太  
上延光方來億萬斯年篤天之祐下臣生長閭巷霑沐  
恩教欲治之主逢享而甚難盛德之事詠歌而不足私  
念嘗以薄技拔于諸生方今採樵之夫俱善談道自古

賦畝之士不忘愛君謹因筆墨之文恭宣竹帛之美形  
容萬一作為頌曰帝宋四葉祖宗重光乃神恭默右序  
繇昌承顏長信御辨明堂秉率先軌總括懿綱報本主  
昊肇禋吉土哀對羣元斂時皇祐瑞品紛盈靈鳳翔舞  
精意格神孝思光古豐樓霈赦寶冊施名龜疇建極鳧  
鷺守成功熙庶事惠浸羣萌億萬之世永光帝絃

斛銘

勿平其量而平其心心苟無邪斯量之嘉

案攷工記有  
嘉量之文原

本作斯量之家誤今改正

論辨

四皓論

善乎子房之能納說也不先事而強聒不後事而失幾  
不問則不言有言則必當其可故聽之易而用之不難  
也評者曰漢業存亡在俯仰間而留侯于此每從容焉  
諸侯失固陵之期始分信越之地復道見沙中之聚始  
言雍齒之侯善言子房矣至于引致四皓羽翼儲官方



之齊桓公會合八國定王世子于首止事簡而力不勞  
其績尤偉而世之君子乃致疑焉謂審有此是子房為  
子結黨以拒父也夫高祖駕馭獨立為帝其才氣雄傑  
豈四老人所能抗乎漢廷大臣力諫之強豈不賢于四  
老人之助乎是蓋未知聖人深許首止之盟而稱管仲  
相齊一匡天下之美也

案匡原本避宋太祖諱  
改作正今從論語本文

易于坎

之九四曰樽酒簋二用缶納約自牖先儒以子房四皓  
之事明之曰人心有所蔽亦有所明欲立趙王如意者

高帝之所蔽也聞四老人之賢願見而莫能致者其心之所明也子房用其明以去其蔽是自牖納約者宜其從之之速也夫先賢之學非世之君子所能及也今據舊史詳載之以見高帝免廢嫡之愆漢家有父子之序非子房其誰賴且子房時然後言言必有益而前史謂良與上言前後甚多非天下所以治亂安危者故不載嗚呼良豈有費言哉

楚王城辨

鄆南之西北距邑十五里有古雉堞曰楚王城其形如  
瓠壺其規千步其高十尺形勢存焉城南隅有神祠數  
椽榜曰楚王廟廟有斷碑雖剝尚可尋繹即唐乾符中  
雲川進士馬昌寓為記指神為晉司馬休之當桓靈寶  
之篡休之自會稽赴援築壘駐兵以俟四方之集其文  
穿鑿無所攷實余閱晉書司馬休之雖封楚居漢中安  
得自會稽唱義復按史記吳王壽夢二年楚之亡大夫  
申公巫臣怨楚將反而奔晉自晉使吳教吳用兵乘車

令其子為吳行人吳于是始通中國吳伐楚十六年楚  
共王伐吳至衡山杜預云吳興烏程縣南是也土人語  
訛呼曰橫山其上猶有城址遺迹則鄣南之墟相去百  
里猶有說焉城之內外耕者多獲石戈矛箭鏃余亦得  
其四五禹貢荊州貢砥礪砮丹春秋時隼集陳廷楛貫  
之石砮長尺有咫時人莫能知而問孔子不近取之荆  
梁而遠取之肅慎非獨荊梁不貢此矢是知中國兵器  
不用石而用銅也明矣則楚王安得為休之耶更俟博

識者辨之

序贊

靈芝序

噫天壤之甄化有自然之妙物其名曰芝草世不常產  
根無定系至虛幽贊太和陶蒸託寓而葩表顯有德豈  
非靈氣之所回復神物之所護持哉侍郎蔣公性正道  
全年者德茂往以致官來還宰旅天子崇旅俊又閔勞  
以事進拜小宗伯告于吳下樹石三徑溪館在焉癸巳

夏六月地中產芝一枝挺然發榮匪莪匪植芬蓋卻邪  
鮮明眩視一之日得土之正其色惟戊得太玄黃園之  
象焉三之日受天之和變彩而紫得句曲燕脂之色焉  
太守李公賞異之率賓僚宴其第奉觴為公之壽復以  
靈芝榜其坊公酢而賦詩歸美于春秋之地主吳士善  
詩者隨而頌嘆之李公見授以書託志其事攷之舊史  
東陽以孝行產于廬次中年有善政生于便坐書之聳  
動揭以昭德公才稱朝廷名為時宗至德中和表于履

道大雅豈弟發為政事不登袞路議者惜焉夫芝仙草也道書載之尚矣其或者以公之德之幼謀謨弗究欲其謠綺季之曲樂義皇之化誕錫難老俾冒遐福以明大有上吉无不利也宿視公丈人行也聞之欣抃然不得侍几杖為壽于樽下亦願以芝名公之館焉

集賢給事俞公送行詩序

春秋之際卿大夫出聘鄰國交接用微言以相感必稱詩以見志若七子之寵趙武六卿之餞韓起是也風有

康公于渭之送雅有顯父出屠之祖瓊琚雜佩之語以  
將其珍意儻革淑旂之詠以聳其行光流風之來所尚  
邈矣集賢夕拜俞公以耆哲之望履中庸之美風德器  
幹作時從臣逮事兩朝間餘三紀節任之要則關中京  
右載籌其筆旂鎮之重則渚宮錢塘迭佩其紱荆吳二  
域政風相翔寶元初上嘉乃賢特詔以覲法宮延對勞  
問移刻出從革輦入陪禁幄參麗正刊修之職居東臺  
論駁之任乃六卿之所履二樞之與鄰蓋將若時而柄



用馬公神守獨勝天均默識不以榮利滑其太和頗勞  
侍從之班少求偃息之地謂宣城佳山水美園館喬梓  
在望案牘差稀可以瑩煩襟養妙氣三進得請一麾遂  
行朝右諸公聳伏夷退自禁庭雋乂之老洎外朝庸敏  
之彥或賦藻什以謠祖帳敘承明之厭直美嵇山之還  
守莫不鏗純命奏追琢取成皆韶武之秘音荆藍之絕  
寶比歌郢之曲相高于國中興臨滄之篇竝傳于江左  
足以廣高齋之逸韻增黃堂之故事宿承貺授本辱命

冠篇絕大雅穆如之章慚未學斐然之累寶元己卯季冬二十八日序

臨海梵才大師真贊

梵才大師以實性會道以餘力工詩天聖中至自台山館于輦寺朝之名臣勝士莫不欣挹其風日至于室參評雅道間印禪理尋被詔譯館訂正智者慈恩二教及同編釋教總錄三十卷七年書成奏御賜紫方袍未幾歸臨海北山掃淨名庵居之慶歷初予自山出守吳興

師適有苕溪之行得尋支許之集自我見將二十年雖  
正始之音泠然在耳而赤髭之相邈哉難值門人有繪  
其像持至都下者宛具眉毫若與神對感舊懷遠為之  
贊云北山大士梵才錫名禪離文字詩陶性情迹安林  
刹聲動王城學徒傳像繪筆何精秀氣閒遠妙相圓成  
此身有報本體無生月皎寒水雲栖太清龍華後會聊  
記宿誠

文恭集卷二十九

欽定四庫全書

文恭集卷三十

宋 胡宿 撰

書啟

上謝學士

某聞昔士擁薦賢之轂有味其言至聖開隆道之門不  
與其退布在方策貽厥後昆是以青雲彌高猶垂可附  
之氣洪鍾善應不聞待叩之音若夫駿望逸羣高材拔

萃惠訓不倦增激于懦夫教思無窮有警于淺俗領先  
覺之事業挺諸生之表儀偃伏下風講聞高誼惟日滋  
久乃心不忘逖瞻京兆之門恭贄許都之刺伏惟某官  
豐規冠世高藻凌雲蘊前識之道華履中庸之德範神  
檢清出降乎崧極之靈天性少成鍾乃奎躔之粹文兼  
三變之體學富九家之流邁天會之寢昌標卿材之獨  
秀平陽充賦聯大對以飛英法坐試言射甲科而得雋  
茂恩加等貢士有開爰當精汰之朝式隆出宰之寄弦

歌在御寬小過而字民銚刃有餘批大郤而從政聊為  
漸陸式亦牽絲丕變一同之風洽聞三異之化屬以堯  
雲修覲漢闕拜書奏東朔之千篇名聞乙牘獻子美之  
三賦觀若堵牆更生之言有補于當世子雲之論不詭  
于聖人食時之賦立成洛下之紙翔貴羣公無出其右  
天子喜同其時故得度越衆賢對揚景命校文延閣動  
太一之威神掌故曲臺顧后蒼之典禮練達質文之統  
周知沿革之綱矧復奕世賢多家公望重處霜臺之鼎

貴奉雲陛之旦朝周公拜前更追故事之美疏傅在後  
未羨曩時之榮會稽之綬既懷承明之廬亦厭亟分半  
刺聿貳方州習貫政經用儒術而飾事沈研吏道宗法  
令以為師潔素絲以在公緩柔轡以馭下道素自處刑  
端益空然而宣室懷賢方佇賈生之對淮南答詔當用  
長卿之文屬兩宮求治之辰非一郡淹才之日行聞三  
節之召入聯四戶之榮延企之誠中外攸若如某者實  
同康瓠賤比多砥管仲之器小哉安能任大汲黯之黷



甚矣胡可適時徒以西學隆文南魚發詠思樂丞髦之  
選勉懷潔已之風引童刻以自持壯夫竊笑學鼠能而  
雖衆一技不成顧輪翮以莫堪飭邊幅而奚用爰披烏  
跡之策幾換鳳鳴之筭仍且屢遘家艱坐更歲舉叔夜  
之不堪滋甚原生之將落可憂知已未仲無林宗之三  
辟治生不善荒楊李之一廛追時好而豈能謀藏身而  
不暇姑欲脫名聲之鎖棄富貴之鞭遠同魚鳥之羣退  
避英髦之域直以舜華載旦周命維新三代同風克用

直心之道四方有志未慚橫目之民庶幾尺蠖之伸更  
礪鉛刀之割伏遇大丞學士輟從周衛闢掌使符慶惟  
桑梓之邦蒙被潤河之福加以沖襟玉裕泰宇淵渟樂  
育人材克盡吹枯之力獎拔士類重嘉溢美之辭咸預  
屬于徽猷皆想見于風采是用掣鈴下館曳裾高門不  
由左右之容徑伸盤躡之禮苟或履錐可用溝木未捐  
回珠吐以見私枉鱗毫而垂飾圮橋跪履無成孺子之  
名南郡橫經請誌先生之論誓將謏薄辱在品題

上兩浙均輸徐學士

某聞吾黨小子仲尼興斐然之嗟天下英才孟軻有樂  
得之歎斯皆樹微言于不朽敦惠訓于方來紀乎油素  
之間煥若日星之際世未喪道天誘其衷誕鍾上智之  
才卓冠生民之秀若乃蚤持鉛割夙奉師嚴以困蒙難  
擊之姿被諄誨惟勤之賜潛心大業雖尅核以自修從  
事華辭終獲落而無用載持篆刻式叩高明庶幾一蔽  
之言未罪三隅之反恭惟某官骨含天粹氣鑠神崧直

如清廟之絃溫若白虹之玉豐規不雜粲邦直之三英  
勝範自居秉民彝之一德自項龍標得雋鳳諾升華金  
管第文天子重平津之對石渠建議諸老伏賈傅之能  
雍容著作之庭密邇清閒之宴高文豔發皆張鷟之青  
錢湧思橫流盡君房之妙筆故得爭臣進秩右史聯榮  
挺漢檻之植躬筮周官之華選組垂大二旦趨紫閣之  
朝牘奏三千日伏青規之地袞無闕職朝有正人大君  
題柱以記名羣公奉贄而結好乃睠三吳之內地實處

九州之上腴六筦攸司鹽鐵之任為重八材所產天地之藏實繁不有計然之謀誰佐大農之賦薦膺神璽出擁使輶紫橐記言少別螭頭之陞繡衣將命遠輝使節之旌酌寬大而撫齊民用峻清而嚴屬部疑獄所讞多惻隱而平反貪吏畏威盡望風而投劾坐統十連之國立富九州之儲不廢清談蓋出餘地金華舊業方任于寶臣羣玉仙山適嚴于冊府行看君節之召徑入天坡之崇當密贊于樞猷豈久商于功利如某者資材甚薄

性習不靈會唐虞稽古之辰隸鄒魯守經之業從師鄭  
校僅明六甲之書鬻技吳人曾乏百金之直往歲以楚  
材擇秀魯席聘珍妄由窮巷之中駿奔嶢闕之下因緣  
典謁獲贄編聯便坐橫經許入安昌之館未行聞道遂  
登南郭之門曲敦提耳之私屢獲鑄人之問仍以類優  
之作徧加溢美之言持布鼓以過雷門方將辟易具太  
牢而饗海鳥終用憂疑未接武于諸生驟纏哀于方寸  
筮仕之門不及歸恩之地無階心疚自傷生意殆盡目

見金城之柳臂垂冥伯之楊弧矢四方雖夙齡而有志  
蓬蒿三徑奈祖褐之不完行閱市中之書勉勤糶下之  
學攻堅不銳叩寂彌空身世在心有韓非之孤憤江山  
滿目多庾信之悲哀追懷圯上之言益厚胸中之愧比  
者國家以裹輪式命刻鵠旌賢講下武之有開思逃虛  
而安得濫攀英軌勉策駑蹄懦夫之氣寢衰大敵之勅  
可畏未能引退竊望利賓所幸者學士輟仙殿之凝嚴  
當外臺之委重言念維桑之朽壤獲居分陝之西封重

撫舞雩之冠更露雕蟲之伎頑疎自愧迂闊無堪重念  
夫操風斤者無可棄之材入蘭室者被維馨之美君子  
之所貴乎道豈以言而廢人善歌者使繼其聲亦有教  
而無類倘顧盍簪之舊未韜鄰燭之光迴珠玉一唾之  
資為風雲萬里之助左氏膏肓之疾倚在一鍼波臣枯  
涸之危繫于斗水哲言將白日庸答所天卑情不任祈恩  
望德依歸之至

上劉學士



自補吏中銓待罪下邑蟬得蔭而方美且無執捕之虞  
鼠忌器而不投適在保全之地俄奉計臺之命俾臨權  
木之醕以弓見招頗識皮冠之守得檄而喜聊慰寒泉  
之心自收迹于下陳日馳魂于重仞泛赤萍之江道換  
丹桂之月弦疲馬依依仰崇軒而有戀亡羊逐逐懼多  
路以成迷念素志以未伸慨壯年之甫過痿人之不忘  
乎起抑乃常情窮者之欲達其言良難自默敢布翹危  
之懇用塵聰徹之聞幸曲霽于威嚴冀少停于神意某

聞士範敦于閭巷于以育乎人材柄用歸于朝廷于以尊于天爵惟拔能而是舉乃聳善之攸先漢世列藩之侯得府檄而作吏魏基大正之職以州品而格人皆所以廣王國之薦延恢士林之賞拔既周咨于行實亦博練于才猷咸經清論之高以取當時之重明試以政無尹何往學之譏薦登諸朝有公叔同升之美尚賢為盛往簡攸高降及本朝覽于前憲廣籠茂士上歸英毅之尊擢引羣才外委价藩之長攷詳幹局參檢行能激官

政以交修統時風而歸厚假人之名器匪易磨世之礪  
石在茲內惟浮賤之蹤竊庇惠和之政偃風惟舊沐德  
茲深固慚走俗之微蔑有托名之所將激昂于懦氣願  
私附于高賢伏惟學士術業周深才謨高正英辭惟敏  
吐五河而並流偉量克寬吞七澤而不懣家著元功之  
籍世仰清光之臣而自鷺序參飛虹光垂照備典午仙  
臺之構掌卯金石室之圖剖判藝文講明憲度獨當臺  
上之直徧閱禁中之書侍史執博山之鑪日薰賜服神

父秉青藜之燭夜訪成編恬榮利以自持遇沐休而不  
出陳咸官薄絕居方進之前孟光年資迴處釋承之右  
武帳歎積薪之學廣內厭直廬之勞擁高箱而出關肅  
將靈命服毳衣而巡國大按祥刑平反有京兆之風決  
囚多御史之雨間屬慎求良翰委重左符佳夢發占應  
獸頭之新舊樂郊行部煥車色之朱丹體寬簡而靖民  
薦中和而統事庚桑用道大移崐嶠之風魯侯尚仁胥  
萃泮林之韻動遵名教之樂居多暇豫之娛胡牀坐談

樓上之興不淺陽春度曲國中之和幾稀重以誘接寒  
流悖崇雅道子將之風鑒特出每持鄉里之評王澄之  
才令相高多為士人之目措紳廕其德宇當世仰其龍  
門矧復最績已凝上心所注華林飾館即時當發于汝  
墳宣室對神半夜將前于釐席入侍高門之地並裁方  
底之書罄伸造辟之辭大展熙朝之業某姿材甚下人  
地並寒衡陋是棲乏高符而布世河清既遇無宏略以  
佐時自託跡于王塗旋服勞于吏鎖政經禱昧官守放

紛仕路濫巾當宵雅肆三之始銓臺攷課有茂陵第六  
之羞還守中田之株復仍長府之貫幸依屬部獲備末  
員少游平生只自希于羣吏騶奴等輩良無益于縣官  
徒以業在學箕志存肯構早竊幽邦之譽誤為前輩之  
知聞勝母之里名少諳趨嚮對於陵之鵝炙僅曉廉隅  
然而力命不侔功庸又薄一躋仕版三見閨餘貧室屢  
空將從孤竹之子槁容日悴近同吟澤之人私懷趨府  
之初特被均茵之遇博以皇道飲聞名理之談接乃朱

顏迴曝溫仁之氣自非木偶幸食土毛知恩紀之罕階  
蓋生緣之內迫惟此翻然之改良非獲已之謀伏望知  
府學士廕棘垂慈拔揚拒謗寬鰥生之不逮察愚守之  
無他均被末光保終前惠筦庫七十少紆薦拔之仁躡  
履三千永有吠鳴之地仰依曠度無廢瞽言要以平生  
繫于升墜

上陳諫議

去歲入調中銓駕言上國匪由介者得侍師嚴登南郡

之絳堂生徒甚衆對安昌之卮酒禮數特親固慚極陋  
之才久事徒勞之役奔波仕路契濶講筵挾策讀書且  
有亡羊之懼操刀學割更懷傷錦之憂寔負空疎何從  
諮仰旋罷休于末局方欣附于美猷虔瞻哲艾之姿頓  
釋羈離之恨洪鐘斯叩每盡春容之音後車見存益隆  
教載之禮闈汪陂之偉度軫墜履之深情念鄒木之輪  
困未登器用哀齊牛之轂觫有惻仁心延華譽于朝紳  
引辟書于相幕朋游改觀身跡生光恩自曲成本噓枯



而及此事從中寢絲連蹇之使然揣薄分以自知在所  
天而曷報窮居京轂坐隔親闈不勝烏烏之情遂謀升  
斗之祿結半通之吏綬竊歎喧卑去數仞之師牆轉成  
孤陋辱五花之判筆裁二雅之雕章送子以言掩雜珮  
路車之贈投人于閻屈夜光明月之珍長北斗之虛名  
耀南轅之行色昔汝南舊俗著子將之評襄陽故時重  
德公之語皆巖野窮栖之士非朝廷素貴之人言論所  
推材品攸定況夫天民先覺之彥德爵達尊之英諾貴

百金望重九鼎效唾足以成寶獎拔由其致榮矧伊寒  
素之流猥玷品題之日拜承嘉貺聳激懦心自歸環堵  
之居適有負薪之恙曠馳謝檄屢換鳴笳背負刺芒愧  
薄夫之不肖量包山藪冀大雅之見容屬春物之芳妍  
仰天倪之恬勝伏惟諫議器博用大道周性全足文獻  
以居朝基太平而展業不吐不如氣雄袞職之臣有德  
有言名冠儒林之右敷明治體練達朝經獻納論思馴  
致中和之政典謨訓誥裁成深厚之風將美居多進忠

匪懈盡禮容而接物恢德宇以服人天懷發中動循于  
教令老成在上未墜于典刑方圖黃髮之賢共秉紫樞  
之化十旬遠至將登荀爽之台司百歲康強更享衛公  
之壽考上扶宗稷大庇蒼黔庶此孤生永棲鈞蔭勉加  
良食行副具瞻

上徐監丞

中阿著詠本推美于育材下體垂言實戒遺于采菲苟  
非躬茂育之至持博古之心則何以擢標幹以上升慶

根荻而致用垂于風雅蓋先民激勸之言行自朝廷實  
君子生成之德其有久盤東鄙偃伏大名曳裾曾展于  
嚴趨改席猥隆于渥眄一介之善俾延獎以居多六尺  
之軀誓報償而不忘敢再稽于前典將少述于丹衷伏  
惟某官西園上才東序秘寶朱絃疏越含清廟之遺音  
竹箭有筠挺會稽之秀質式邁亨嘉之運誕揚休令之  
名而自玉帛貢賢弓旌竚俊紫宸試可擢構厦之宏材  
鴻筆飛英奉揚廷之大對黃香才器處漢室之無雙衛

玠風流居晉廷之第一式膺寵渥出貳藩防當三載之  
陟明奉十行之細札彌茂思皇之舉益隆乃眷之知宣  
室問神重賈生之應對中堂落筆驚子美之文華旋通  
籍于蘭臺復聯榮于仙殿陳三山之圖籍定四部之籤  
題著鄭默之中經洞分朱紫紬馬遷之實錄妙際天人  
故當自西掖之升華由內廷之將命紫泥封詔遠追長  
慶之風青鎖承宣密視淮南之草矧僉謀之所屬顧嚴  
詔以非稽如某也本之聲猷素無輪翮繩樞少賤非三

川聲利之家韋帶安貧異七葉貂蟬之族徒以真人撫  
運王道興譚奉鉛槧以自強顧魯魚而不辨七日隱霧  
未遑下食之心六月搏風安有排虛之翼既服勤而無  
狀徒鑽仰以為勞適值國家妙選時英精掄鄉秀詔書  
寬大容庇迹于神臯文雅縱橫竟沽名于朝右內慚狂  
斐旁歎羈孤蟠木輪困既絕先容之助刺字漫滅徒興  
逆旅之嗟因力綴于編聯偶上塵于聽視祇期倡優方  
朔誠有類于枚臯刻畫無鹽亦深慚于西子豈謂某官

志敦善誘道尚謙鳴愍顏回之不愚謂子房之可教至  
以名公接席多士登門迴月旦之評曲加題品傳春秋  
之字遽辱褒稱俾寒灰之復燃令困獸而思鬪矧預最  
靈之列豈忘佩服之誠敢不淬勵縑緗服從名檢上以  
全公卿之奇遇次則成父母之榮歡如泥在鈞更假良  
工之手漆身為癩永懷國士之知

上徐舍人

故歲恪趨神輦祇調天官代舍食魚早託賓榮之列珍

池浴鳳式瞻鼎貴之姿因持爵里之名爰達巾幘之侍  
均熊引坐捉麈賜談久要不忘迴加于獎拔一夫未獲  
深致于咨嗟靡矜廉陞之宗匪間斗筭之賤禮容溫穆  
德廕恢疎私慚駕下之流本乏芥微之善出菰蘆之內  
安有美材居韋布之中早蒙屈體飾青黃于溝斷問朱  
紫于月評水鑑論才謬竊襄陽之譽蒲葵振價乃成中  
宿之資足為貧女之宵光豈有家丞之秋實濫偕時俊  
猥玷科榮一命牽絲預陳咸之官簿五年隨牒過管父



之瓜時困膏火之煎熬有齏鹽之窮苦俛眉刀筆之吏  
困跡風塵之塗攀跼曲拳自厭莊書之禮伊優骯髒備  
嘗秦客之吟自解去于官聯旋入參于選格小材累日  
有長調以斯存高足據津無遠圖而自致辱台符之次  
補當民版之勾稽去英雄所躔之都事州縣徒勞之職  
望鄧林而借樹未獲棲身歷吳坂以駕車分甘俛首其  
如辱交游之光寵玷恩紀之薦延年勢漸高已嘆東隅  
之失河清難遇恐成大耄之悲旋辭闕里之牆歸訪隆

中之舍沈約之病寬韋帶哀駘之肘卧垂楊春服既成  
邈阻沂童之舞龍門不見况勞記室之心職由疲繭之  
姿絕奉琢磨之問仰天倪之專氣協神觀之葆光伏惟  
副閤舍人文炳鈞奎識侔大蔡特稟武山之氣首躋王  
國之才丹穴靈姿絕雲霓而上擊明堂奇棟凌霄壑以  
自高會東戶之顯時蘊南臺之賢業秉筆贊為于名命  
實代聖言造辟入告乎謨猷允推君德已茂寶臣之略  
式隆赫尹之瞻定草淮南方警言玉峯之署調梅傳野久

虛金鼎之司佇宣枚卜之求以迪謨明之業豈惟蕞質  
獲託化鈞抑亦輿情僉圖大庇願加大食永輔本朝

上知府劉學士

近以隆冬聿暮瑞霰其零天粹融甘屏薦瘥之故氣土  
膏含潤發豐懋之嘉占竊欣時律之和頗動春螽之躍  
因著擊轅之作仰塵隱几之觀學將落而有來文久廢  
而無次猪苓至鄙奚登藥籠之收鼠璞未屠甘薦玉人  
之謂周章失次泐墨交并豈謂知府學士循誘凝懷秉

彛尚德枉燕公之妙筆裁漢將之清篇灑雲朶以封題  
遣犀髯而特遺筠編况發繡段交輝字截寸金價超尺  
璧少陵韓苑悚避風騷之壇咸池大章鏘流杳默之韻  
掩郢樓之絕調詫梁席之諸賓忘位貌之威嚴樂名教  
之敦獎過私月旦之品謬借春秋之評撫弱質以自驚  
眷具僚而胡幸昔者和尚書之什樂天不繫于官資答  
中郎之詩盧諶亦由于故吏著在舊史用為善談悉由  
高世之才方隆上笏之晒孤生何者素蘊缺然蚤繫地

餅之名濫竊庭鷄之食陳完弛擔庇寬政以為優元叔  
登堂承高風而有自素飧無咎榮貺已多敢紆正始之  
音更重屈尊之禮封殖嘉樹比甘棠而不忘投報木爪  
枉英瑤而太厚伏惟知府學士仙瀛高彥王國上才能  
讀典墳過楚臺之倚相老于文學類唐室之次山聊分  
銀兔之符未陟金鰲之頂行趨召節入綴近班庶幾珠  
玉之篇便為冠劍之物藏于魯壁與經義而並陳副在  
晏楹期來茲而共秘永言銜刻匪克攄宣

上蘇州蔣諫議

近削柔函恭塵侍閣仰承左顧迴篤光謙託瓊蘊以致  
言損玉音而流問得孟公之牘素所榮藏比淮王之書  
更逾苑秘載懷降挹彌切欽銘屬時律之戒涼仰道樞  
之協勝伏惟諫議風猷挺絕宇量粹融抱式古之上才  
厚當陽之渥暎紫囊著位蚤陟金坡之崇綠詔宣風薦  
領銀符之寄甘棠載路已聽于歡謠華黍盈疇更聞于  
豐歲行被節旄之召佇參鼎席之司係瞻所深庇暉有

望煩鞅是拘傾搖正劇忽遘飛郵之便猥流華牘之音  
英眇迴殊仰一謙之斯厚至言可佩在三復以攸深載  
涉素商之辰諒安純氣之守伏惟諫議體兼四德識照  
萬殊敷休績于本朝挺豐規于上列屢分方面之寄益  
隆宸極之懷賦政東藩適著惠和之化宣猷南闕佇歸  
宥密之司翹頌所深序陳匪逮

上李相公

某聞伊尹之格皇天恥一夫之有失周公之贊明辟務

三握以自勤蓋由保乂王家總司國柄鑪錘造物上代  
于化工履履任才廣量于人品俾洽至和之氣用無太  
息之聲故能享咸德之顯稱保碩膚之全美文武未墜  
歷百年而可知聖賢相望邈千載而非遠伏惟相公識  
探萬奧體煥三英強毅簡溫日以宣乎衆德和惠忠肅  
世實濟其大猷當永定之席圖御明臺而訪政紫宮命  
相上配六符之星黃閣秉鈞坐調四氣之燭魁柄斟酌  
同北斗之在天生民竦瞻若南山之有石率百官而稱



職育萬物以由庚桃李無言布清陰于天下鹽梅有味  
戒公餗于鼎中間屬金七修明玉關撤警廟堂甘寢無  
庸樽俎之師藩閫于宣益光社稷之鎮錫山南國賜履  
東秦成功有不處之名蒼生深未起之歎旋屬中天降  
詔溫洛改轅卓匹馬而來朝秉介圭而修覲禁塗延對  
左壺之漏屢移法座疇咨龍準之顏載悅經火辨鍾山  
之玉拭土見干將之鋒元精所生寶鎮增重矧以地尊  
卜洛府重居留萬戶帝宮備時巡而斯在九金神鼎奠

國壤以備存煩于謹之行臺領留侯之管籥商山調護  
早深綺季之思漢閣規隨夙盛平陽之業將還舊德之  
食永固立賢之基冠釣席于宰庭保靈光于永歲上毗  
哲后大廕斯人中外所瞻為日滋久某性端幽昧業蘊  
枵疏世閱寒平略無紱冕之緒天衢巍煥切勤方甲之  
書棄襜褕之耕衣習雍容之矩步思風澀訥學殖單疎  
悼類鶩之無成苦食雞之不飽年稱甲子未平絳老之  
疑山過具教多犯魯君之諱一昨詔開諸路州舉羣廉

濫隨三百之竿切駕一封之傳遂偕茂士猥玷榮科辱  
吏牒之充員在賤曹而受事屑屑斗筲之役悠悠風塵  
之塗成嗇夫之綸章起家為幸效南華之官智宿業無  
聲豈忘飭篋以自修亦冀椎輪之有漸嚮緣滿秩訖獲  
交官方隨上計之行來赴東銓之集公車下士正感駟  
奴之錢長安諸郊未獲司農之鐸幸遇相公前趨大旆  
來侍邃旒袞衣詠我公之歸赤舄寵韓侯之入夙仰宗  
公之望想聞風采之嚴迫位貌之甚微苦聲猷之素薄

先談木器早無萬乘之容北首金臺甘後四方之至豈  
意紫垣之碩老俯哀黃綬之幽蹤持箕斗之虛名達鈞  
衡之哲輔聞樂切忤私權聳于佳音懷響必彈難括囊  
于中臆重念某仕塗艱梗緒業漂淪鷺鳥趨時切媿史  
公之論君美遺母空持頽考之心胸臆結約以亡奇精  
神蹇淺而可歎望青雲而在目悵白日之無津惟奇高  
世之賢再奉持樞之拜宰平衆職總覈羣才坱圠無垠  
重啟大鈞之播柔嘉維則更流懿德之稱庶依材館之

賓願預藥籠之物儻塵銘造誓竭懦衷

又

伏承台旆就統英躔聆溫綽之有初企行臺而增慰伏  
惟某官為國雋老稟天粹靈秉懿在躬濟和及物星樞  
席位居常賴于謨明帝室作藩動必資于夾輔矧龜蒙  
之巨鎮乃鉅野之舊邦實倚元勳用寬東顧近在旦暮  
入冠宗公勉為廟朝益敦福履

文恭集卷三十

欽定四庫全書

文恭集卷三十一

宋 胡宿 撰

書啟

上江州張殿丞

伏自署吏南淮整裝東路背浮雲之高闕過脩竹之舊園適逢王國之才得請天臺之告上廬齋刺竊沿雅故之情密坐邀談猥厚將迎之禮言樞煥發心府洞開教

督諄諄迴曝秋陽之氣燕胥侃侃僅侵夜鼓之聲迫中路之思歸歎征車之莫駐一別如雨悵身跡之靡停千里背淮幾營魂之獨逝來還堵室伺守交官芳桂攀援山中之思無賴春梅折贈隴頭之訊蓋稀允懷穆若之姿屢下赧然之汗自當未局日力迷書司民之版掌寔繁將何批郤舊尹之政經尚在得以伐柯惟宇廕之恢疎深仕塗之棲倚曠伸懿仰併積瞻翹諒恬育于貞襟固動臻于吉履伏惟殿丞性資上哲名俊中州仕版聯



華蚤協南魚之詠禁門引籍聿參翔鳳之朝端勝範以  
照人服清猷而高世斯言無玷本顧行以相先所至有  
聲蓋試功之惟允迺者秦川將命漢傳鞫辭財利是寬  
出仁心之恤隱訟喧既解亦朝論之歸高屬求刺部之  
賢適下舉知之詔需頭薦削交集于公車方底恩章首  
頌于東省矧溢城之名壤壓江紀之上游自守東平之  
麾已報營丘之政追車降命將聞二節之來煩幄承光  
行輟一臺之妙某朽疎無狀庇賴有年奉言侍以末階

幸葆綏而適願

上蔡龍圖

再調銓符遠縻吏綬山城僻左謁居淮服之旁人迹闊  
疎鮮去日圍之下政旌塵而殊邈撫鍾律以屢遷流水  
託音久莫馳于尺記高山仰德未始忘于寸心內惟筮  
仕之年早詣序賓之館三握髮而迎士適振緒風一引  
席以與言猥參末論仰荷深中之量曲垂嚮下之風旋  
收跡于門庭聿抗容于塵土日月云邁歲星將近于一

終節物再更春日屢傷于千里逖瞻姿度遐鬱心魂仰  
惟馥馥之賢適處保釐之任鎮雌堂而克靜保虹氣以  
彌充伏惟龍圖學士德本上成仁為己任元陽高識出  
衆議以居多次道宏才結萬夫之所望早侍法官之側  
並參端委之遊直躬見于王臣大略推乎國器爰奉价  
藩之寄用寬制閫之謀南國是疆倚梁臺而為重東郊  
出尹降畢冊以為優自大旆之肅臨實樂都之悅化朝  
議蓋資于夾輔師瞻益在于弼違千室鳴弦已播陪京

之地十晨易筆行歸議政之堂中外所祈晝宵于是伏冀順茲炎燠務乃燕申上扶宗社之靈以慰華戎之望

上馬少保

早隨毛檄獲仕鄭鄉仰天臺舊齒之臣辭仙殿納言之  
寵安石就第獎元老以惟優行馬施門旌上卿而惟厚  
問趨恩館曾曳鄒裾逖瞻哲父之姿仰霽威嚴之色三  
握髮而迎士式振前猷一引席以與言猥參下綴屈尊  
崇而展接忘浮賤以見收旋奉役于他邦因贊名于侍

閤仍賜箋函之召曲開宴俎之筵荷盼飾以兼常在心

銘而固敦迫尸官之煩溷惕奏記之淹違方義馭之戒

炎仰莊環而處順

案莊環二字不經見據本集與孫秘校啟有勉味莊懷句疑此環字亦懷

字之說

無爽味腴之道益隆生福之基伏惟致政少保功

煥太常謀高前著勤宣一德有樊侯秉彛之風逮事三

朝奮林父盡忠之節寶名照世惠政及民方隆維石之

瞻俄請引年之制三孤進律峻周典之官儀五福備身

享箕疇之陰隲况簡在于上帝方圖任于舊人佇雙節

之登賢由小車而命相永綏眉壽上翊丕圖中外所瞻  
旦暮如是伏冀為國自重

上祠部謝學士

伏自蠲淮補吏亟擁于單車鱸序橫經驟遙于文席流  
光適迅外役煩挈嚮屬私奴之行嘗修亭長之問逮速  
郵之既至辱溫教之嗣頌書意甚親榮降孟公之几字  
褻見獎寵踰尼父之經銘淑貺以無涯拜高命而增悖  
且有乞靈之意猥煩下聽之聰雖推轂之興憐終觸機

之為累鵠雛抗志應增腐鼠之貪龍斷圖榮甘竦賤夫  
之謂旋攜銳志來自迷書賦茅勞神寢歎徂公之識折  
麻寄意空馳楚客之心撫愧汗以自流鬱煩襟而增結  
兼審伏延英之上閣奉永定之成書聯三府之鉅公搗  
一朝之大典專春秋之筆門人訥于措辭奏新語之篇  
天子為之稱善居然麟作副在玉京式均鴻霈之恩用  
紀婉微之績道家藏室爰止于史官太微積星迺升乎  
郎位矧靈臺之宏峻且理窟之精明清襟之篇已歸于

仲寶黑頭之望當在于王公勉重青冥之期勤進素絲  
之食雅承誨矩正閤師門遐瞻貴秀之資永有庇暉之  
地

上小謝學士

閤略師惟奔趨吏局滔滔江域阻從一葦之航冉冉年  
華驟易四時之柄雖復吳舫接尾晉傳交塗繭幅抒言  
悵嗣音之久絕鶴天寫望徒蒿目以增疲仰恩制之善  
居用椎規而自處載經素齋克守冲機恭惟某官精識



超殊雄辭鼓動豹文蔚變駭帝囿之珍羣璧米混成冠  
天壇之粹寶自聯飛漢牘更直應廬國典係其辯章朝  
英以之欽服入陪庭議常諤諤之匪躬出佐郡麾每皇  
皇而求義方稜鼎盛業守俱高適隆丹扆之知遽結素  
冠之釁杯棬如昨諒至性以奚堪霜露載均幸哀懷之  
少抑式安履用以叩天光某猥用薄能資承惠訓席間  
侍坐飽聞談麈之微詔下取才首預歌革之薦因緣慰  
藉承被甄收濫按策之分科叨絲言之補吏州縣為職

揣鳧鶴以自安冰檠在公憂駑駘之莫強庶幾卿蔭施  
及危蹤楚旆搖風接辭顏而尚邈汝評改月求題品以  
未遑系頌之誠實邁常等

上梅學士

近飭歸裝爰經樂國歎聲姿而有舊喜占拜以無窮更  
僕乃留久陪于譚塵終宴不倦屢接于朋樽將迎之禮  
過優渙墨之顏增甚適旋冗局驟隔雋鋒未遑摩削以  
致誠猥辱丁寧而賜教蓬心所激荷瓌意以無忘蘭德

彌薰佩嘉言而不捨載懷谷養久格時休伏惟學士王  
國上流天臺駿望紳纓胥伏闕閱居高夙駕雙轡未副  
材于雄寶走趨二節行被召于凝嚴幸公食之勉加佇  
恩綸之狎至瞻懷所劇布序寧殫

上胡諫議

近者祇赴敝局驟闊後塵瓊樹瞻風方懷于勞想銀鈎  
布體猥降于華牋仰荷屈尊敢忘拜賜屬景文之貫序  
諒沖氣以均和伏惟省主諫議密勿宣猷浚明邁德吉

逢昌會先展宏圖總成賦于中邦克昭丕績贊大謨于  
近幄行冠冢司辱在獎題倍深翹頌

又

濫紆帝綍關掌國財一乘敝車方駐北轅之役十連大  
幕匪遙東路之程自跼跡于煩拏闕致誠于摩削猥蒙  
輝盼先損函封洒鏤管之珍詞布朶雲之妙蹟仰承佳  
腆之貺俯盈感篆之懷適臨朱夏之交諒安純氣之守  
伏惟諫議高岡瑞質東序瓌姿識侔大祭之靈材任崇

臺之幹出入周衛斷國論以優長典領大權宅王畿而  
平秩峻坡上之華級鎮浙西之巨藩報政營丘荐凝于  
丕績攷庸大寢行需于殊恩勉葆懿和用符欽頌

又

近拜璽符諒塵鈴侍屬漕舟之特役渴大幕之趨風遠  
荷懿憐嗣頌溫教捧華牋而為重披緝旨以增勤銘悅  
交懷悚兢次集晏陰協序令朔告辰諒保順于天倪必  
坦寧于福履岫岫峻望式注于外朝噩噩寶書行催于

召節勉尊寢膳用副瞻祈

上馬尚書

榮臨制閭肅接前旌奏刺行臺嘗聳瞻于輝表參謀支  
郡彌薰疊于風猷屬曹事之敷紛媿箋問之疎闊仰高  
齋之笑詠亮粹宇之寧和伏惟某官識貫神著材表國  
棟練朝章而精密達治體以該深帝幄敷言運嘉謀于  
漢著師垣賦政得良翰于周邦圖勲舊以在茲握鈞衡  
而孔邇勉遵福履行契官占淪滯之蹤甄揚有所企頌

之素寤想弗忘

上晏侍郎

素篇迎寒仲商紀候四時為燭發顓氣之清英萬寶得  
秋極崇丘之高大伏惟某官對司神化副掌天鈞夙夜  
在公秉賢猷而克壯惠和濟世翊聖政以惟新居然內  
輔之臣實繫蒼生之望行踐上公之席永扶太極之尊  
蚤荷埏鎔彌深傾禱

又

迺者之官利局假道京華飾固陋以曳裾恭修爵里露  
威嚴而開閣度接詞顏嘗欽禮遇之優稽拜箋封之問  
茂涉迎郊之令蔚為生福之基伏惟侍郎業擅謨明體  
包光智參裁宥密之命敷融政令之和萬戶離宮暫分  
于管籥三公神化方寄于阿衡佇圭覲之修儀由師瞻  
而正席甄揚所託系咏尤深

又

近者漕車上計爵刺修名邇台座之榮光深蒙委照接



山庭之粹表屢獲承顏霽鈞軸之威嚴厚茵憑之禮遇  
載旋冗局驟隔後塵戀賢館以回瞻幾馳營魄仰樞庭  
之坐論彌富祺祥伏惟樞密侍郎識造動微才周治體  
逢辰萬世之旦稟氣五潢之精自入輔于帝圖彌緝熙  
于神化典樞慎密襄天緯以在茲賦政將明位星垣而  
匪夕資承鈞造倍切頌瞻

上分司李侍郎

近擁單車適旋敝局曠致問于左右寢結戀于朝晡自

清暑之協辰諒褒光之為美伏惟侍郎望高肅哲體具  
誠明踐歷三臺皁衣之朝有日藩宣四國甘棠之政在  
民樂南華繕性之言慕子文逃富之志懇辭貴仕榮保  
令名方圖任于勲賢佇冠居于台屏夙叨題獎倍積欣  
翹

上安州范侍郎

寶魏全封乾台舊德地雄垣屏朝倚金湯惟參變于化  
鈞諒同休于國體節焉巖石久孤師尹之瞻是有袞衣

行佇我公之復歎炎甫盛頤護有加欽嚮禱悃誠無喻  
焉

上轉輸許祠部

載擁高麾來巡支郡崇陰拂地咸歌召伯之仁竹騎滿  
郊實慰并兒之戀煦冬曦而愛物傾丹府以過人私慚  
擊柝之才竊庇柔嘉之德宿官以業既乏臺駘之能有  
文者東復曠翁歸之美仰荷汪汪之度猥矜齷齪之姿  
忘持斧之尊嚴厚分庭之顧遇其言有味若炙輶之無

窮厥德不同輔毛之克舉庶冀天而垂廕冒燕地以  
生春內惟浮賤之蹤永刻獎提之貺屬鳴騶之在御思  
託乘以無階悅別旌軒坐移鍾律思致箋函之問想塵  
几閣之嚴叢爾幽棕居成曠禮惟溫陽之戒序諒沖氣  
之在襟恭以祠部性本自誠體資洵直太丘道廣躬博  
愛以能周吳公治平集茂勲而居最旋領商功之任蓋  
資足食之謀三官之寶已充萬乘之知尤異即奉追車  
之命行歸簪筆之司日侍清光冥升貴級惟祈葆育以

副瞻翹

上亳州李觀察

伏審觀察近擁使旌暫辭天陛帝旒凝睠乍別于威顏  
侯圃臨戎適資于機略寵靈加異慶慰僉同伏惟觀察  
文雅光朝簡和濟世聿修厥德本戴記之中庸克壯其  
猷協周詩之元老爰從近列式將廉車四牡于藩奠與  
區于景毫百壺出餞聳榮觀于都門初宣條教之文已  
載歌謠之路哲艾之美方簡于二宮將明之材佇歸于

三事未遑參覲徒此頌瞻

上高郵劉國博

近者奉役外邦經途樂國修名上舍瞻傑表以彌溫造  
跡末行挹清言而有味軫懷楚履展接融樽矍圃之賓  
且賢濫陪射鵠太學之驩已醉未許歌驪篤英眇以迴  
深刻幽襟而罔報屬詣斗筭之任亟奔星火之程去丹  
戟之戎扉別紫芝之眉宇乃心增繫惟日弗忘在信次  
之甫經諒宴安之克暢伏惟國博材標磊砢器韞高閒

學總羣言存掌成均之職政提衆目遠符循傳之風佇  
一節之恭趨期十旬而遠至勉精恬育副是宰惛

迎呂相啟

茂德格天精忠貫日才肩房令居多應變之功智比姚

崇允號濟時之相

案此下有闕佚

答簽判張監丞謝及第啟

去夏嘗泛吳航相值淮服申尋舊好略諧少日之留契  
閣清言忽成環歲之別山間之蹊辟左日下之問闊稀

但懷想于盍簪終絕馳于去牘鳥嚶鳴于山谷尚或求  
聲魚相忘于江湖無由煦濕日者通郵馳報守邱傳音  
初聆第課之勞擢丞大匠旋審攷文之盛親策羣廉升  
造秀之士名協方聞之詔選恩華舉集才令喧傳昭王  
涂拔士之賢見文代嚮儒之勝間年得俊榮玉籍之再  
升故事題名美翠珎之雙刻仍慶左曹之詔來從下郡  
之游同官為僚得名彥而殊樂因心則友緣夙契之愈  
深矧營道之所同固首公之無間實有仰成之望深慰



索居之懷兼審行已戒裝將即赴幕開秋始肅關暑西  
頽惟導養之有方諒燕申之增鬯恭以某官才思通敏  
格量淵虛文素擅于天經學皆優于師法赴鋒車之勸  
駕常被詳延應拱璧之嘉招早居參畫勤績素聞于大  
府薦函交委于內臺會齋伐于東銓仍充賦于神甸一  
登文石之陞再至太微之庭謁者臚傳推湛恩而進秩  
太常籍奏程高藻以升科用階萬里之途實養一時之  
棟親逢在旦遠志莫涯猥辱曩情首貽榮牘閱腴辭之

溢簡題淑貺以盈襟念挹晤之甫諧實笑抃之交會行  
矣自愛適茲願言

與孫秘校

承服大名從來有日棲遲衡泌闊略辭顏豈期天陞之  
簡良得預邦英之接迹高山在目頓祛仰止之勞清風  
襲人可量穆如之快尋沿官牒來戾士鄉且知星駕之  
行已赴瓜時之往雖忠信之室近接于雞音然名理之  
談阻陪于犀柄遯懷神守妙集天倪同年某官識具深

明德華森茂久著聲于俊域暫養晦于英僚魏煥之風  
方開于聖旦峻良之器宜備于皇家勉味莊懷少符丘  
禱

徐紫微問候啟

間者修好寶鄰託蹤後乘忝無辱命良自依仁旋赴局  
于南州阻趨風于西省尺題展問迫煩鞅之未遑下館  
翹心覺饑虔之已甚載瞻德履允固道沖伏惟某官國  
棟挺材天球薦質抱周時之器用蘊表世之文華典命

于右曹裁成大訓奉思于武帳祇告嘉猷被宸睠以方  
隆竦師瞻而克峻行參槐鼎以右家邦欽頌之私度越  
常品

樞密侍中問候啟

間者葱鬱之城恪修于王覲熒煌之座恭接于台光旋  
回跡于漕司日搖心于賢館萬機兢業方藉于弼違五  
福康寧允鍾于嘉告伏惟某官大修厥德夙壯其猷為  
一代之宗臣論三公之至道樂只流詠式殿于大邦良

或作歌克康于元首永毗寶統長處師瞻凡在幅員僉  
同禱望

知郡郎中啟

項在內朝驟瞻峻采承入辭于幄坐已夙駕于藩麾顧  
通謁之匪遙亦叙違之莫及瞻言尊府素號名城陶齊  
魯緒餘之風居然雅俗被龔黃寬簡之政卓爾樂郊几  
牘用希神明增勝伏惟某官器能開敏行義端修垂紳  
早列于周班起草久潛于漢署西京循吏甫揚豈弟之

風宣室邇臣行踐論思之地永惟系頌實倍等倫

運使郎中啟

博約之風彛違于文繹悃勞之想久積于咨察比辱教  
函常銘謙眷屬有羈牽之累頗稽裁答之誠必冀寬明  
未繩曠慢自素商之屆序諒沖氣之臻和伏惟某官學  
迺名家行惟高世躬靖康而樂道體深沈而著書雅意  
在于本朝未躋法從直指銜于使節猶滯美材制異俗  
之跳梁成遠民之安阜佇疇茂績并迓崇恩未獲晤言

尤增沖塞

知郡司封啟

伏自藩府出總臺舸戒行忽星歲之載華悵山川之云  
邈阻陪談塵曠奉書郵自宣布于教條諒綏寧于戩福  
伏惟某官簡溫迪德膚敏懷才早登進于英髦亟躋榮  
于禮闈佐列侯之受計歷典要司領大使以宣風聯分  
劇部稍滯朱轡之守猶稽紫橐之持行奉詔除入升法  
從願言瞻禱曷既敘宣

上淨覺啟

道風斯偃法會且遙企三昧之頓呻阻親慈相叩一乘  
之圓頓莫挹微言徒馳資仰之誠未救悃勞之吝緬惟  
宴坐增集吉祥伏惟闍黎大士夙植密因廣薰衆德以  
一音而說法為四衆之導師蹟應三吳若優曇之出現  
教行諸部等法雨之普滋尚阻披承可涯瞻結

文恭集卷三十一